



URED ZA REVIZIJU INSTITUCIJA BiH  
КАНЦЕЛАРИЈА ЗА РЕВИЗИЈУ ИНСТИТУЦИЈА БиХ  
AUDIT OFFICE OF THE INSTITUTIONS OF BOSNIA AND HERZEGOVINA



H.Čemerlića 2, 71000 Sarajevo, Tel: ++ 387 (0) 33 70 35 73, Fax: 70 35 65 - www.revizija.gov.ba, e-mail: saibih@bih.net.ba

---

**PRAĆENJE REALIZACIJE PREPORUKA  
REVIZIJE UČINKA**

Broj: 07-16-1-984/18

Sarajevo, oktobar 2018. godine



## **Praćenje realizacije preporuka revizije učinka**

Ured za reviziju proveo je praćenje aktivnosti institucija BiH na realizaciji preporuka revizije učinka za dva izvještaja revizije učinka objavljenih u oktobru 2014. godine. Predmet praćenja bile su preporuke iz izvještaja revizije učinka „Raspodjela i korištenje sredstava tekuće rezerve“ i „Smještaj aktivnih vojnih lica u Ministarstvu odbrane BiH“.

Praćenje je provedeno u skladu sa ISSAI – Međunarodnim standardima vrhovnih revizionih institucija, Principima revizije učinka, Vodičem za reviziju učinka i Vodičem za osiguravanje kvalitete u reviziji učinka vrhovnih revizionih institucija u BiH.

Osnovni cilj ovog Izvještaja je da se mjerodavnim institucijama i javnosti prezentuju aktivnosti odgovornih institucija na realizaciji preporuka revizije učinka koje su date s ciljem da se unaprijede područja koja su bila predmetom revizije i sačuvaju budžetska sredstva. Rezultati praćenja ukazuju na smanjenje procenta realizacije preporuka u odnosu na raniji izvještaj o praćenju realizacije preporuka iz 2017. godine.

U revidiranoj oblasti raspodjele i korištenja sredstava tekuće rezerve, stanje se nije značajnije promijenilo u odnosu na period vršenja revizije (2014. godina). Djelomična realizacija preporuka revizije dovela je do određenog unaprjeđenja prakse u dijelu nadzora i izvještavanja o korištenju sredstava tekuće rezerve.

Međutim, preporuke revizije nisu realizovane u dijelu koji se odnosi na donošenje jasnih pravila i procedura o korištenju sredstava tekuće rezerve, kao i određivanje oblasti od posebnog javnog interesa. Transparentnost u postupcima dodjele sredstava tekuće rezerve nije osigurana pa sredstva tekuće rezerve se i dalje dodjeljuju bez javno objavljenih poziva.

Ni u revidiranoj oblasti smještaja aktivnih vojnih lica u Ministarstvu odbrane nije došlo do promjene, odnosno poboljšanja. Ministarstvo odbrane nije pristupilo rješavanju problema smještaja aktivnih vojnih lica u skladu sa preporukama revizije. Iako je Ministarstvo odbrane usvojilo Akcioni plan za implementaciju smještaja profesionalnih vojnih lica, izostale su aktivnosti Ministarstva u skladu sa navedenim Akcionim planom koje bi doprinijele realizaciji preporuka revizije.

Generalno posmatrano, nije ostvaren značajan napredak u revidiranim područjima. Za sveobuhvatno unaprjeđenje potrebno je uložiti dodatne napore u realizaciju preporuka revizije. Na taj način doprinijet će se efektivnijem upravljanju sredstvima tekuće rezerve te na ekonomičniji način riješiti pitanje smještaja aktivnih vojnih lica u Ministarstvu odbrane.

Izvještaj je, u skladu sa članom 16. i članom 17. Zakona o reviziji, dostavljen Parlamentarnoj skupštini, Predsjedništvu, Vijeću ministara, Ministarstvu finansija i trezora i Ministarstvu odbrane.

### **GENERALNI REVIZOR**

Dragan Vrankić, v.r.

### **ZAMJENIK GENERALNOG REVIZORA**

Jasmin Pilica, v.r.

### **ZAMJENIK GENERALNOG REVIZORA**

Ranko Krsman, v.r.



Sadržaj

<b>Korištene skraćenice</b> .....	4
<b>Izvršni rezime</b> .....	5
<b>1. UVOD</b> .....	7
<b>1.1. Cilj i svrha praćenja</b> .....	7
<b>1.2. Prethodna praćenja</b> .....	7
<b>1.3. Tekuće praćenje</b> .....	8
<b>1.3.1. Predmet i obim</b> .....	8
<b>1.3.2. Izvori i metode</b> .....	8
<b>1.3.3. Osnovni podaci</b> .....	9
<b>2. POSTUPANJE NADLEŽNIH INSTITUCIJA PO IZVJEŠTAJIMA</b> .....	11
<b>2.1. Parlamentarna skupština</b> .....	11
<b>Razmatranje izvještaja „Raspodjela i korištenje sredstava tekuće rezerve“</b> .....	11
<b>Razmatranje izvještaja „Smještaj aktivnih vojnih lica u Ministarstvu odbrane BiH“</b> .....	12
<b>2.2. Vijeće ministara</b> .....	12
<b>Razmatranje izvještaja „Raspodjela i korištenje sredstava tekuće rezerve“ i         zaključaka Parlamentarne skupštine</b> .....	12
<b>3. PREDUZETE AKTIVNOSTI INSTITUCIJA NA REALIZACIJI PREPORUKA PO POJEDINAČNIM IZVJEŠTAJIMA</b> .....	14
<b>3.1. Izvještaj revizije učinka „Raspodjela i korištenje sredstava tekuće rezerve“</b> ..	14
<b>Ocjena realizacije preporuka – Aktivnosti institucija na realizaciji preporuka</b> .....	19
<b>3.2. Izvještaj revizije učinka smještaj aktivnih vojnih lica u Ministarstvu odbrane</b>	22
<b>Ocjena realizacije preporuka – Aktivnosti institucija na realizaciji preporuka</b> .....	24
<b>DODACI</b> .....	26



## Korištene skraćenice

<b>Skraćenica</b>	<b>Puni naziv</b>
AVL	Aktivna vojna lica
Dom naroda	Dom naroda Parlamentarne skupštine Bosne i Hercegovine
ISFU	Informacioni sistem finansijskog upravljanja
Ministarstvo civilnih poslova	Ministarstvo civilnih poslova Bosne i Hercegovine
Ministarstvo finansija i trezora	Ministarstvo finansija i trezora Bosne i Hercegovine
Ministarstvo odbrane	Ministarstvo odbrane Bosne i Hercegovine
Ministarstvo vanjske trgovine i ekonomskih odnosa	Ministarstvo vanjske trgovine i ekonomskih odnosa Bosne i Hercegovine
Parlamentarna skupština	Parlamentarna skupština Bosne i Hercegovine
Predsjedništvo	Predsjedništvo Bosne i Hercegovine
Predstavnički dom	Predstavnički dom Parlamentarne skupštine Bosne i Hercegovine BiH
Ured za reviziju	Ured za reviziju institucija Bosne i Hercegovine
Vijeće ministara	Vijeće ministara Bosne i Hercegovine
Zakon o budžetu	Zakon o budžetu institucija Bosne i Hercegovine i međunarodnih obaveza Bosne i Hercegovine



## Izvršni rezime

Ured za reviziju je proveo praćenje realizacije preporuka s ciljem procjene njihove implementacije i stanja u revidiranim područjima. Utvrđeno je smanjenje procenta realizacije preporuka u odnosu na izvještaj o praćenju realizacije preporuka iz 2017. godine, a što je prikazano u narednoj tabeli.

Tabela 1: Pregled realizacije preporuka revizije učinka

Stepen realizacije	Procent realizacije preporuka u izvještaju o praćenju iz 2017. godine	Procent realizacije preporuka u izvještaju o praćenju iz 2018. godine
Realizovano	24%	0%
Djelomično	32%	18%
Početne aktivnosti	44%	36%
Nisu preduzete aktivnosti	0%	46%
<b>Ukupno</b>	<b>100%</b>	<b>100%</b>

Izvor: Ured za reviziju

Iako su preporuke revizije usvojene od mjerodavnih i prihvaćene od odgovornih institucija, kod većine institucija odgovornih za njihovu realizaciju nismo pronašli relevantne analize stanja i informacija o nadzoru realizacije preporuka revizije i relevantnih zaključaka. Zaključci Vijeća ministara se neće realizovati ukoliko Vijeće ministara ne osigura nadzor njihove realizacije. Isto važi i za zaključke Parlamentarne skupštine.

U sljedećoj tabeli prikazana je ukupna realizacija preporuka revizije učinka iz izvještaja "Raspodjela i korištenje sredstava tekuće rezerve".

Tabela 2: Pregled realizacije preporuka za izvještaj "Raspodjela i korištenje sredstava tekuće rezerve"

Stepen realizacije	Broj preporuka	Procentualno
Realizovano	0	0%
Djelomično	2	40%
Početne aktivnosti	3	60%
Nisu preduzete aktivnosti	0	0%
<b>Ukupno</b>	<b>5</b>	<b>100%</b>

Izvor: Ured za reviziju

Četiri godine nakon objave izvještaja revizije učinka, dvije preporuke revizije su djelomično realizovane, a za tri preporuke su preduzete početne aktivnosti. Na osnovu ovakvog stepena realizacije preporuka možemo konstatovati da nije ostvaren značajan napredak u revidiranom području. Nisu donesena pravila i procedure koje bi doprinijele transparentnom i namjenskom korištenju sredstava tekuće rezerve. Određena poboljšanja u revidiranom području se mogu konstatovati u dijelu vršenja nadzora i izvještavanja o korištenju sredstava tekuće rezerve. Iznos sredstava tekuće rezerve u posmatranom periodu je smanjen.

U sljedećoj tabeli prikazana je ukupna realizacija preporuka revizije učinka iz izvještaja "Smještaj aktivnih vojnih lica u Ministarstvu odbrane BiH".



**Tabela 3: Pregled realizacije preporuka za izvještaj "Smještaj aktivnih vojnih lica u Ministarstvu odbrane BiH"**

<b>Stepen realizacije</b>	<b>Broj preporuka</b>	<b>Procentualno</b>
Realizovano	0	0%
Djelomično	0	0%
Početne aktivnosti	1	17%
Nisu preduzete aktivnosti	5	83%
<b>Ukupno</b>	<b>6</b>	<b>100%</b>

Izvor: Ured za reviziju

Četiri godine nakon objave izvještaja revizije učinka, nijedna preporuka revizije nije realizovana ili djelomično realizovana, za jednu preporuku su preduzete početne aktivnosti, dok za pet preporuka revizije nisu preduzete aktivnosti. Na osnovu ovakvog stepena realizacije preporuka možemo konstatovati da nije bilo napretka u revidiranom području. Ministarstvo odbrane nije nastavilo sa realizacijom započetih aktivnosti na koje se obavezalo. Troškovi za smještaj AVL ostali su nepromijenjeni.



## **1. UVOD**

U uvodnom dijelu ovog Izvještaja obrazložen je opći cilj i svrha praćenja realizacije preporuka revizije učinka, hronologija prethodnih praćenja, te osnovne informacije o tekućem praćenju.

### **1.1. Cilj i svrha praćenja**

Zadatak revizije učinka je izvještavanje o efikasnosti, efektivnosti i ekonomičnosti programa ili aktivnosti, a pravovremena realizacija preporuka i unapređenje rada je zadatak revidiranih institucija.

Praćenje realizacije preporuka iz izvještaja o provedenim revizijama učinka predstavlja finalnu fazu revizije učinka koja slijedi nakon ciklusa planiranja i izvršenja revizija učinka. Praćenje je neophodan element u reviziji učinka jer potiče na odgovornost institucija kojim su upućene preporuke i osigurava povratne informacije o efektima provedenih revizija.<sup>1</sup>

Praćenje izvještaja revizije učinka i analiza aktivnosti nadležnih institucija nakon objave izvještaja predviđeno je i dokumentima Ureda za reviziju: Principi revizije učinka, Vodič za reviziju učinka i Vodič za osiguravanje kvaliteta u reviziji učinka.<sup>2</sup>

Preporuke date u izvještajima revizije učinka se trebaju pratiti kako bi se ustanovilo koje mjere su nadležne institucije preuzele po datim preporukama, koje preporuke su realizovane i koji efekti su ostvareni. Vrijeme, predmet i obim praćenja realizacije preporuka je odluka vrhovnih revizionih institucija.<sup>3</sup>

Praćenje postupanja institucija BiH po datim preporukama revizije učinka je aktivnost koju Ured za reviziju provodi s ciljem osiguravanja efektivnosti revizijskih izvještaja, pravovremene i efikasne realizacije preporuka i pružanja povratne informacije za Ured za reviziju, zakonodavnu i izvršnu vlast o realizaciji datih preporuka.

### **1.2. Prethodna praćenja**

Od uspostave funkcije revizije učinka, Ured za reviziju je zaključno sa 31.12.2017. godine objavio ukupno 33 pojedinačna izvještaja revizije učinka i četiri izvještaja o praćenju izvještaja revizije učinka, odnosno praćenju realizacije preporuka iz izvještaja revizija učinka.

Praćenje prvog objavljenog izvještaja revizije učinka<sup>4</sup> Ured za reviziju je proveo po Zaključku Parlamentarne skupštine iz 2009. godine, a Informacija o utvrđenim rezultatima<sup>5</sup> dostavljena je Parlamentarnoj skupštini 2010. godine.

Ured za reviziju je 2014. godine izvršio praćenje šest izvještaja revizije učinka koji su objavljeni u periodu od 2010. do aprila 2013. godine.<sup>6</sup> Izvještaj o utvrđenim rezultatima<sup>7</sup> je dostavljen

<sup>1</sup> ISSAI 300.

<sup>2</sup> Odlukom Koordinacionog odbora broj: 12-50-1-19-2/09 usvojeni su Principi revizije učinka; Odlukom Koordinacionog odbora broj: 06-50-1-4/13 usvojen je Vodič za reviziju učinka; Odlukom Koordinacionog odbora broj: 06-50-1-5/13 usvojen je Vodič za osiguravanje kvaliteta u reviziji učinka.

<sup>3</sup> ISSAI 3200 – Smjernice za postupak revizije učinka

<sup>4</sup> Izvještaj revizije učinka: Proces zapošljavanja državnih službenika u institucijama BiH, 09.04.2009. godine.

<sup>5</sup> Naknadna revizija – Informacija o realizaciji preporuka Ureda za reviziju institucija BiH iz oblasti revizije učinka, februar 2010. godine.

<sup>6</sup> Nabavka računarske opreme u institucijama BiH; Upravljanje troškovima zakupa za rad i smještaj institucija BiH; Stambeno zbrinjavanje povratnika; Višegodišnja kapitalna ulaganja institucija BiH; Upravljanje voznim parkom u institucijama BiH; Upravljanje zasnovano na rezultatima kroz planove i izvještaje institucija Vijeća ministara BiH.

<sup>7</sup> Praćenje realizacije preporuka revizije učinka, 25.02.2014. godina.



Parlamentarnoj skupštini i Vijeću ministara, a sve institucije BiH su o objavi izvještaja informisane putem cirkularnog pisma.

Treći izvještaj o praćenju realizacije preporuka iz osam izvještaja revizije učinka objavljen je 2016. godine, a njime je obuhvaćeno praćenje preporuka iz osam izvještaja revizije učinka objavljenih u periodu od jula 2013. godine do jula 2014. godine.<sup>8</sup>

U 2017. godini objavljen je četvrti izvještaj praćenja realizacije preporuka iz dva izvještaja revizije učinka objavljenih u 2014. godini.<sup>9</sup>

Svi raniji izvještaji o praćenju realizacije preporuka su razmatrani i usvojeni na Parlamentarnoj skupštini sa zaključkom da su odgovorne institucije dužne realizirati nerealizovane preporuke revizije.

### **1.3. Tekuće praćenje**

#### **1.3.1. Predmet i obim**

Ured za reviziju je nastavio sa aktivnostima praćenja izvještaja revizije učinka. Ovoga puta su predmet praćenja dva izvještaja revizije učinka koji su objavljeni u novembru i decembru 2014. godine. Praćenjem je obuhvaćen period od objave izvještaja do sredine 2018. godine.

**Tabela 4: Pregled izvještaja revizije učinka koji su predmet praćenja**

<b>Redni broj</b>	<b>Naziv izvještaja</b>	<b>Datum objave</b>
1.	Raspodjela i korištenje sredstava tekuće rezerve	13.11.2014.
2.	Smještaj aktivnih vojnih lica u Ministarstvu odbrane BiH	30.12.2014.

Izvor: Ured za reviziju

Ured za reviziju je analizirao stanje iz područja koja su revidirana i analizirao:

- Koje aktivnosti su preduzimale nadležne institucije (Parlamentarna skupština i Vijeće ministara) nakon objavljivanja izvještaja revizije učinka?
- Da li su i u kojoj mjeri institucije preduzimale aktivnosti na realizovanju preporuka revizije učinka i zaključaka nadležnih institucija?
- Imajući u vidu ciljeve revizije, koje su se promjene stanja u revidiranim oblastima desile u odnosu na stanje iz izvještaja?

Revizija je analizirala preduzete aktivnosti bez utvrđivanja razloga za preduzimanje istih, tj. nije ispitivano da li su iste posljedica datih preporuka revizije ili su posljedica drugih okolnosti.

#### **1.3.2. Izvori i metode**

S ciljem prikupljanja podataka o realizaciji preporuka i zaključaka nadležnih institucija, svim institucijama BiH koje su bile obuhvaćene prvobitnom revizijom je dostavljeno cirkularno pismo. U pismu su navedene date preporuke iz izvještaja i zaključci nadležnih institucija. Od

<sup>8</sup> Praćene su preporuke iz sljedećih izvještaja revizije učinka: 1. Rad komisija institucija BiH; 2. Uslovi za efikasnu i efektivnu kontrolu PDV-a i prisilnu naplatu duga; 3. Upravljanje robom oduzetom u carinskim postupcima; 4. Efikasnost FIPA-e u privlačenju stranih investicija u BiH; 5. Rezultati reforme javne uprave; 6. Pretpostavke za efikasan rad Agencije za prevenciju korupcije i koordinaciju borbe protiv korupcije; 7. Telekomunikaciona rješenja u institucijama BiH; 8. Upravljanje ugovorima o djelu i ugovorima o privremenim i povremenim poslovima.

<sup>9</sup> Izdaci za sudske sporove i Kontrola zračnog prometa BiH.





institucija je traženo je da u pisanoj formi predstave aktivnosti koje su poduzimale, kao i dokaze kojima se to potkrepljuje.

Potrebne informacije su prikupljene i na temelju analize zapisnika (zaključaka) sa sjednica Predstavničkog doma, Doma naroda i Vijeća ministara, analize zakonskih i podzakonskih akata, izvještaja, informacija, medijskih natpisa, objava u Službenom glasniku BiH, izvještaja finansijske revizije, i sastanaka sa subjektima revizije.

U izabranom metodološkom pristupu teret dokazivanja preduzetih aktivnosti na temelju preporuka je na instituciji kojoj su preporuke bile upućene. Na temelju odgovora institucija na upit Ureda za reviziju o preduzetima aktivnostima na realizaciji preporuka i dostavljenih dokaza, vršena je procjena stepena preduzetih aktivnosti. Za navode institucija o preduzetim aktivnostima, bez adekvatnih dokaza, dodatno su traženi dokazi. Smatrali smo da aktivnosti koje nisu spomenute u odgovoru institucije, niti su za njih dostavljeni dokazi, a koje je podrazumijevala data preporuka ili zaključak nadležnih institucija, u konkretnom izvještaju, nisu ni preduzimate.

Utvrđene su četiri moguće kategorije realizacije preporuka:

- Prva – **realizovano** - institucije su okončale aktivnosti navedene u preporuci, odnosno preporučene kontinuirane aktivnosti se redovno provode – stanje u revidiranom području je značajno popravljeno;
- Druga – **djelomično** – u institucijama je u toku realizacija preporuka, odnosno izvjesna je realizacija određenih aktivnosti navedenih u preporuci – postignut je napredak u revidiranom području;
- Treća – **početne aktivnosti** – institucije su planirale ili stvaraju preduslove za realizaciju aktivnosti navedenih u preporuci – nije bilo napretka u revidiranoj oblasti;
- Četvrta – **nisu preduzete aktivnosti** – nisu konstatovane aktivnosti na realizaciji preporuka ili nisu dostavljene informacije o preduzetim aktivnostima – nije bilo napretka u revidiranom području.

Također, u procesu procjene realizacije preporuka, konsultovane su kolege iz revizionih timova koji su vršili predmetne revizije, kao i kolege iz finansijske revizije, te je za ocjenu stanja prikupljana dokumentacija koja je dodatno poslužila za ocjenu realizacije preporuka. Za procjenu realizacije preporuka iz izvještaja revizije učinka Raspodjela i korištenje sredstava tekuće rezerve na bazi uzorka provjeravano je da li korisnici izvještavaju o namjenskom utrošku sredstava kao i da li nadležne institucije zaključuju ugovore sa korisnicima sredstava.

### **1.3.3. Osnovni podaci**

Izvještaji su dostavljeni revidiranim institucijama, Parlamentarnoj skupštini, Vijeću ministara, Predsjedništvu, Ministarstvu finansija i trezora i Ministarstvu odbrane.

Svaki izvještaj objavljen je na internet stranici Ureda za reviziju i praćen je saopćenjem za medije. U narednoj tabeli prezentovani su podaci o preporukama iz izvještaja koji su predmet tekućeg praćenja.



**Tabela 5: Pregled broja preporuka po izvještajima i po institucijama**

Redni broj	Naziv izvještaja	Ukupan broj preporuka	Broj preporuka po instituciji		
			VM BiH	MFT	MO
1.	Raspodjela i korištenje sredstava tekuće rezerve	5	3	2	
2.	Smještaj aktivnih vojnih lica u Ministarstvu odbrane BiH	6			6

Izvor: Ured za reviziju



## 2. POSTUPANJE NADLEŽNIH INSTITUCIJA PO IZVJEŠTAJIMA

U ovom poglavlju predstavljene su aktivnosti nadležnih institucija, Parlamentarne skupštine i Vijeća ministara, po izvještajima revizije učinka.

### 2.1. Parlamentarna skupština

Predstavnički dom i Dom naroda su razmatrali i usvojili oba izvještaja revizije učinka koja su predmet tekućeg praćenja. Prilikom usvajanja izvještaja Parlamentarna skupština je usvojila i zaključke u kojima se traže povratne informacije o realizaciji preporuka revizije od nadležnih institucija. Navedenim se vrši dodatan pritisak na odgovorne institucije BiH da realiziraju date preporuke revizije.

U narednoj tabeli prikazano je vrijeme razmatranja izvještaja od strane Parlamentarne skupštine.

Tabela 6: Pregled datuma razmatranja izvještaja u Parlamentarnoj skupštini

Redni broj	Naziv izvještaja	Razmatranje u Predstavničkom domu	Razmatranje u Domu naroda
1.	Raspodjela i korištenje sredstava tekuće rezerve	12. sjednica održana 28.05.2015.	6. sjednica održana 23.06.2015.
2.	Smještaj aktivnih vojnih lica u Ministarstvu odbrane BiH	12. sjednica održana 28.05.2015.	6. sjednica održana 23.06.2015.

Izvor: Ured za reviziju

Oba izvještaja revizije učinka su razmatrana na istim sjednicama domova Parlamentarne skupštine. Usvajanjem izvještaja revizije učinka utvrđena je obaveza odgovornih institucija za realizaciju preporuka iz izvještaja revizije učinka.

#### Razmatranje izvještaja „Raspodjela i korištenje sredstava tekuće rezerve“

Predstavnički dom je na svojoj 12. sjednici održanoj 28.05.2015. godine usvojio izvještaj revizije učinka „Raspodjela i korištenje sredstava tekuće rezerve“ sa sljedećim zaključcima:

1. *Predstavnički dom PS BiH traži od Agencije za prevenciju korupcije i koordinaciju borbe protiv korupcije BiH da u najkraćem roku detaljno analizira izvještaj o izvršenoj reviziji učinka o temi "Raspodjela i korištenje sredstava tekuće rezerve" i utvrdi da li je u raspodjeli i korištenju sredstava tekuće rezerve bilo sukoba interesa i elemenata korupcije, te o nalazima Agencije obavijesti Predstavnički dom.*

2. *Predstavnički dom PS BiH traži od VM BiH da u roku od 90 dana izvijesti Predstavnički dom o realizaciji revizorskih preporuka po izvještaju o izvršenoj reviziji učinka o temi "Raspodjela i korištenje sredstava tekuće rezerve".*

3. *Predstavnički dom PS BiH traži od MFT da tromjesečno Predstavničkom domu dostavlja detaljan izvještaj o raspodjeli i korištenju sredstava tekuće rezerve.*

Dom naroda je na svojoj 6. sjednici održanoj 23.06.2015. godine usvojio izvještaj revizije učinka „Raspodjela i korištenje sredstava tekuće rezerve“ sa sljedećim zaključkom: *Zadužuje se VM BiH da u roku od 90 dana izvijesti Komisiju za finansije i budžet Doma naroda PS BiH o planiranim i preduzetim aktivnostima na provođenju preporuka iz Izvještaja, te o poduzetim aktivnostima upozna i Ured za reviziju institucija BiH.*



## Razmatranje izvještaja „Smještaj aktivnih vojnih lica u Ministarstvu odbrane BiH“

Predstavnički dom je na svojoj 12. sjednici održanoj 28.05.2015. godine usvojio izvještaj revizije učinka „Smještaj aktivnih vojnih lica u Ministarstvu odbrane BiH“ sa sljedećim zaključkom:

*Predstavnički dom Parlamentarne skupštine BiH traži od Ministarstva odbrane da u najkraćem roku izradi i dostavi akcioni plan za realizaciju revizorskih preporuka po izvještaju revizije učinka o temi "Smještaj profesionalnih vojnih lica u Ministarstvu obrane BiH".*

Dom naroda je na svojoj 6. sjednici održanoj 23.06.2015. godine usvojio izvještaj revizije učinka „Smještaj aktivnih vojnih lica u Ministarstvu odbrane BiH“ uz sljedeći zaključak:

*Dom naroda Parlamentarne skupštine BiH zadužuje Ministarstvo odbrane BiH da u roku od 90 dana obavijesti Komisiju za finansije i budžet Doma naroda o planiranim i poduzetim aktivnostima na provođenju preporuka iz izvještaja, te da o poduzetim aktivnostima upozna i Ured za reviziju institucija BiH.*

### 2.2. Vijeće ministara

Vijeće ministara je razmatralo izvještaj revizije učinka „Raspodjela i korištenje sredstava tekuće rezerve“ i prije njegovog razmatranja na Parlamentarnoj skupštini, te za realizaciju preporuka zadužilo Ministarstvo finansija i trezora. Nakon što je Parlamentarna skupština usvojila izvještaj, Vijeće ministara je razmatralo zaključke Predstavničkog doma koji su usvojeni tom prilikom.

Vijeće ministara nije razmatralo niti donosilo zaključke po izvještaju revizije učinka „Smještaj aktivnih vojnih lica u Ministarstvu odbrane BiH“.

U narednoj tabeli prikazano je vrijeme razmatranja izvještaja od strane Vijeća ministara.

Tabela 7: Pregled datuma razmatranja izvještaja/zaključaka u Vijeću ministara

Redni broj	Naziv izvještaja	Datum razmatranja		
		Izveštaj	Sjednice Vijeća ministara po zaključcima Predstavničkog doma	Sjednice Vijeća ministara po zaključcima Doma naroda
1.	Raspodjela i korištenje sredstava tekuće rezerve	113. sjednica, 27.11.2014.	11. sjednica, 17.06.2015	-
2.	Smještaj aktivnih vojnih lica u Ministarstvu odbrane BiH	Nije razmatrano	-	-

Izvor: Ured za reviziju

## Razmatranje izvještaja „Raspodjela i korištenje sredstava tekuće rezerve“ i zaključaka Parlamentarne skupštine

Vijeće ministara je na svojoj 113. sjednici, održanoj 27.11.2014. godine, razmotrilo i usvojilo Izvještaj Ureda za reviziju o izvršenoj reviziji učinka na temu „Raspodjela i korištenje sredstava tekuće rezerve“, te za realizaciju preporuka zadužilo Ministarstvo finansija i trezora. Nakon što



je Parlamentarna skupština usvojila izvještaj, Vijeće ministara se na svojoj 11. sjednici, održanoj 17.06.2015. godine, upoznalo sa zaključcima koje je Predstavnički dom usvojio prilikom razmatranja izvještaja, te s tim u vezi donijelo i zaključke koji glase: *Za realizaciju zaključaka donesenim povodom rasprave o izvještaju RU "Raspodjela i korištenje sredstava tekuće rezerve" zaduženi su: a) Agencija za prevenciju korupcije i koordinaciju borbe protiv korupcije BiH za realizaciju zaključka pod brojem 1; b) Ministarstvo financija i trezora BiH za realizaciju zaključaka pod brojevima 2 i 3.*



### **3. PREDUZETE AKTIVNOSTI INSTITUCIJA NA REALIZACIJI PREPORUKA PO POJEDINAČNIM IZVJEŠTAJIMA**

#### **3.1. Izvještaj revizije učinka „Raspodjela i korištenje sredstava tekuće rezerve“**

##### **Cilj i svrha revizije**

Cilj revizije bio je utvrditi da li se sredstva tekuće rezerve koriste transparentno i u svrhu njihove osnovne namjene. Cilj revizije bila je i identifikacija slabosti u procesu odobravanja, nadzora i izvještavanja o korištenju sredstava tekuće rezerve, te pokazati da se efikasnijim korištenjem i boljom kontrolom može doprinijeti postizanju bolje finansijske discipline, podizanju svijesti o javnoj odgovornosti i učinkovitijem korištenju javnog novca. Dalje, cilj revizije je bio i skretanje pažnje na pojavu i loše prakse pri donošenju odluka o raspodjeli javnih sredstava, te donosiocima odluka i korisnicima sredstava ukazati na javnu odgovornost spram raspodjele i korištenja javnog novca.

##### **Ključni nalazi i zaključci**

Nalazi do kojih se došlo ukazuju da proces raspodjele i korištenja sredstava tekuće rezerve ne osigurava osnovne pretpostavke transparentnosti, namjenskog i efikasnog korištenja javnog novca. Javna sredstva u budžetu iskazana kao tekuća rezerva nisu korištena za hitne i nepredviđene situacije čiji izostanak finansiranja bi imao posljedice po društvo.

Tokom 2012. i 2013. godine, kroz sredstva tekuće rezerve utrošeno je više od 10 miliona KM budžetskih sredstava. Od ovog iznosa, putem odluka Vijeća ministara, na finansiranje tekućih aktivnosti u institucijama BiH potrošeno je više od 7,5 miliona KM. Preostali iznos je po odlukama Vijeća ministara, predsjedavajućeg Vijeća ministara i njegovih zamjenika, utrošen kroz stavku „grantovi neprofitnim organizacijama“.

Sredstva koja su dodjeljivana institucijama BiH najčešće su korištena za tekuće izdatke poslovanja, plaće i naknade, nabavku opreme i kapitalne izdatke. Putem grantova neprofitnim organizacijama, na netransparentan način, sredstva tekuće rezerve dodjeljivana su sportskim klubovima i sportskim udruženjima, vjerskim i humanitarnim organizacijama, različitim udruženjima građana i kulturno-umjetničkim društvima, medijima, budžetskim korisnicima nižih nivoa vlasti, te pojedincima.

Iako se problemi nenamjenskog korištenja sredstava tekuće rezerve mogu donekle pripisati nejasnoći zakonske regulative i nepostojanju provedbenih akata, niti jedna od nadležnih institucija nije pokretala inicijativu da se ovi problemi riješe.

Zakonima je Ministarstvu finansija i trezora dodijeljena važna kontrolna funkcija. Ona nije adekvatno uspostavljena. Kontrolne aktivnosti su bile ograničene i nisu osiguravale namjensko i transparentno korištenje ovih sredstava. Ministarstvo finansija i trezora nije iniciralo donošenje provedbenih akata kojima bi definisalo nadzor dodjele i korištenja sredstava tekuće rezerve.

Izvještavanje o korištenju sredstava tekuće rezerve je također ograničeno. Kako odluke o dodjeli sredstava korisnike ne upućuju na obavezu izvještavanja, ne čude rijetki, površni i u informacijama vrlo oskudni izvještaji korisnika sredstava tekuće rezerve. O sredstvima koja su koristile institucije BiH izvještavalo se šturo u redovnim godišnjim izvještajima o radu. O efektima iskorištenih sredstava nije izvještavano.



## **Trenutno stanje u revidiranoj oblasti**

Stanje u revidiranoj oblasti raspodjele i korištenja sredstava tekuće rezerve nije značajnije promijenjeno u odnosu na period revidiranja, 2012.-2014. godina.

Preporuka revizije čijom implementacijom bi se uredila ova oblast u smislu donošenja pravila i procedura o korištenju sredstava tekuće rezerve u pogledu namjene, uslova korištenja i načina izvještavanja o utrošku sredstava nije realizovana. To znači da se tekuća rezerva i dalje dodjeljuje na isti način, bez da se radi o hitnim i nepredviđenim situacijama čiji izostanak finansiranja bi imao posljedice po društvo, bez zadovoljenja principa transparentnosti i načina izvještavanja o utrošku sredstava.

Što se tiče transparentnosti u postupcima dodjele sredstava tekuće rezerve, sredstva tekuće rezerve se dodjeljuju bez javno objavljenih kriterija za apliciranje i uslova korištenja. Dio sredstava tekuće rezerve kojim raspolažu predsjedavajući i zamjenici predsjedavajućeg Vijeća ministara i članovi Predsjedništva se dodjeljuje na osnovu dosta uopćenih i neiscrpnih internih kriterija.

Oblasti od posebnog javnog interesa koje će se na transparentan način finansirati iz sredstava tekuće rezerve nisu utvrđene. S obzirom da ove oblasti nisu definisane, i dalje je prisutna praksa finansiranja istih korisnika u toku budžetske godine i putem sredstava tekuće rezerve i putem sredstava tekućih grantova institucija BiH, za iste ili slične namjene<sup>10</sup>.

Trenutno stanje u revidiranoj oblasti i dalje karakteriše izraženo diskreciono pravo donosilaca odluka. Zakonom o budžetu je proširen krug donosilaca odluka za korištenje sredstava tekuće rezerve. Tako su od 2015. godine odluke o raspolaganju tekućom rezervom počeli donositi i članovi Predsjedništva. Raspolaganje tekućom rezervom zadržali su i predsjedavajući Vijeća ministara i njegovi zamjenici, osim u slučaju 2016. godine.

Bitno je naglasiti da je došlo do pomaka u segmentu praćenja utroška sredstava na način da odluke Vijeća ministara o odobravanju sredstava tekuće rezerve za ostale korisnike, odluke članova Predsjedništva o odobravanju sredstava tekuće rezerve za neprofitne organizacije i pojedince, i odluke predsjedavajućeg i zamjenika predsjedavajućeg Vijeća ministara o odobravanju sredstava tekuće rezerve za neprofitne organizacije i pojedince, sadrže odredbu o obavezi dostavljanja izvještaja o namjenskom utrošku sredstava.

Iznos sredstava tekuće rezerve odobren Zakonom o budžetu varira kroz godine. Uporedimo li period 2012.-2014. sa periodom 2015.-2017., potrebno je istaći da je došlo do smanjenja iznosa odobrenih sredstava budžetske rezerve za 5,7 miliona KM. U periodu od 2012. do 2014. godine ukupno je budžetom odobreno 15,8 miliona KM sredstava tekuće rezerve, dok je za period od 2015. do 2017. godine odobreno 10,08 miliona KM. U Dodatku 1. detaljnije su prikazani iznosi sredstava tekuće rezerve po godinama, kao i po donosiocima odluka o korištenju sredstava.

---

<sup>10</sup> Odluke o rasporedu sredstava tekućeg granta „Sufinansiranje sportskih manifestacija“ za 2016. i 2017. godinu, Vijeće ministara broj 142/16 i 301/17; Odluke o dodjeli sredstava za projekte u okviru međunarodne kulturne saradnje za 2016. i 2017. godinu, Vijeće ministara broj 138/16 i 303/17; Odluke o dodjeli sredstava za sufinansiranje projekata institucija kulture u BiH za 2016. i 2017. godinu, Vijeće ministara broj 140/16, 260/16, 265/16 i 302/17; Odluka o dodjeli grant sredstava crkvama i vjerskim zajednicama u BiH za 2016. godinu, Vijeće ministara broj 331/16; Odluka o dodjeli grant sredstava za podršku organizacijama osoba s invaliditetom u BiH za 2016. godinu, Vijeće ministara broj 330/16; Odluka o dodjeli grant sredstava Ministarstva za ljudska prava i izbjeglice BiH za 2017. godinu, Vijeće ministara broj 314/17;



## **Odluke Vijeća ministara o dodjeli sredstava tekuće rezerve institucijama BiH i ostalim korisnicima u 2016. i 2017. godini**

Posmatramo li stanje sa aspekta namjene dodijeljenih sredstava tekuće rezerve u zadnje dvije godine (2016. i 2017. godina), možemo konstatovati da nije bilo značajnijih promjena u smislu poštovanja odredbi Zakona o finansiranju<sup>11</sup>. I dalje je prisutna praksa finansiranja tekućih i kapitalnih izdataka institucija BiH iz sredstava tekuće rezerve.

Od ukupnog iznosa tekuće rezerve koji je odobren Zakonom o budžetu za 2016. godinu (959.000 KM), 363.000 KM je odlukama Vijeća ministara dato na raspolaganje budžetskim korisnicima za finansiranje tekućih izdataka.

Od odobrenog iznosa za tekuću rezervu za 2017. godinu (3.307.000 KM), 711.445 KM je odlukama Vijeća ministara dato na raspolaganje budžetskim korisnicima za finansiranje tekućih i kapitalnih izdataka. Namjena dodijeljenih sredstava varirala je od finansiranja plaća i naknada zaposlenih, finansiranja putnih troškova pa do finansiranja kapitalnih izdataka.

U Dodatku 2. detaljnije su prikazani iznosi i namjena sredstava tekuće rezerve dodijeljenih institucijama BiH.

Od ukupnog iznosa tekuće rezerve za 2016. godinu (959.000), 235.938 KM je odlukama Vijeća ministara dato na raspolaganje ostalim korisnicima:

- Fizičko lice – 5.938 KM<sup>12</sup>
- Grantovi neprofitnim organizacijama – 20.000 KM<sup>13</sup>
- Grantovi nižim nivoima vlasti – 210.000 KM<sup>14</sup>

Revizija je na uzorku provjeravala da li su korisnici<sup>15</sup> sredstava tekuće rezerve iz Odluke Vijeća ministara broj 213/16 (210.000 KM), ispoštovali obavezu izvještavanja o namjenskom utrošku sredstava. Iako je po Odluci postojala obaveza dostave izvještaja o namjenskom utrošku sredstava od strane korisnika putem Ministarstva finansija i trezora, u kabinetu predsjedavajućeg Vijeća ministara, kao ni u pomenutom Ministarstvu, nisu raspolagali sa izvještajem o namjenskom utrošku sredstava.

Od odobrenog iznosa za tekuću rezervu za 2017. godinu (3.307.000 KM), 1.830.141 KM je odlukama Vijeća ministara dato na raspolaganje ostalim korisnicima:

- Grantovi neprofitnim organizacijama – 15.000 KM<sup>16</sup>
- Grantovi korisnicima budžetskih sredstava nižih nivoa vlasti – 215.141 KM<sup>17</sup>
- Grantovi korisnicima budžetskih sredstava nižih nivoa vlasti i grantovi neprofitnim organizacijama – 1.600.000 KM<sup>18</sup>

Iznos od 1.600.000 KM dodijeljen je nižim nivoima vlasti, neprofitnim, vjerskim i sportskim organizacijama. U odluci o odobravanju sredstava navedeno je da će pojedinačne ugovore o

<sup>11</sup> Zakon o finansiranju institucija BiH, član 17. stav (2): „Sredstva tekuće rezerve mogu se koristiti za: finansiranje hitnih i vanrednih izdataka i programe koji nisu uvršteni u budžet; finansiranje troškova međunarodnih sporova i arbitraža; finansiranje novih institucija Bosne i Hercegovine koje tokom fiskalne godine steknu status budžetskog korisnika; grantove neprofitnim organizacijama. (Službeni glasnik BiH broj 61/04 i 49/09)

<sup>12</sup> Odluka Vijeća ministara broj 70/16, Službeni glasnik BiH broj 35/16

<sup>13</sup> Odluka Vijeća ministara broj 76/16, Službeni glasnik BiH broj 41/16

<sup>14</sup> Odluka Vijeća ministara broj 213/16, Službeni glasnik BiH broj 76/16

<sup>15</sup> Arhitektonski fakultet u Sarajevu; Ministarstvo prostornog uređenja, građenja i zaštite okoliša Kantona Sarajevo; Opština Rogatica; Sveučilište u Mostaru;

<sup>16</sup> Odluka Vijeća ministara broj 225/17, Službeni glasnik BiH broj 73/17

<sup>17</sup> Odluka Vijeća ministara broj 305/17, Službeni glasnik BiH broj 6/18

<sup>18</sup> Odluka Vijeća ministara broj 316/17, Službeni glasnik BiH broj 8/18





namjenskom utrošku sredstava sa korisnicima zaključiti Ministarstvo civilnih poslova, Ministarstvo vanjske trgovine i ekonomskih odnosa i Ministarstvo prometa i komunikacija. Također, korisnici sredstava su bili u obavezi da dostave izvještaje o namjenskom utrošku sredstava putem ministarstava sa kojima su sklopili ugovore, a Generalni sekretarijat Vijeća ministara je trebao da objedini izvještaje i pripremi ih za Vijeće ministara.

Revizija je na bazi uzorka ispitala da li korisnici dostavljaju izvještaje o namjenskom utrošku sredstava tekuće rezerve za ugovore zaključene sa Ministarstvom civilnih poslova i Ministarstvom vanjske trgovine i ekonomskih odnosa.

Uvidom u ugovore koje su korisnici sklopili sa Ministarstvom civilnih poslova vidljivo je da je rok za dostavu izvještaja 30 dana po okončanju projekata, te da su projekti još uvijek u toku realizacije. Izuzetno, jedan korisnik<sup>19</sup> je okončao projekat i dostavio izvještaj o utrošku sredstava koji je Komisija za finansijsku kontrolu sredstava tekuće budžetske rezerve ocijenila kao nepotpun te u dva navrata tražila dopunu izvještaja u skladu sa sklopljenim ugovorom.<sup>20</sup> Ugovori koji su sklopljeni sa korisnicima u ovom Ministarstvu propisuju rokove za izvještavanje, formu izvještaja, kao i izvještaj nezavisnog revizora kojim se verificiraju troškovi projekta, odnosno potvrđuje da li je trošak za svaku stavku stvarno i nastao i da li se odnosi na korisnika sredstava.

Iz Ministarstva vanjske trgovine i ekonomskih odnosa dostavljeni su ugovori sklopljeni sa krajnjim korisnicima. Većina projekata je u toku, korisnici imaju obavezu dostaviti izvještaj o namjenskom utrošku sredstava. Ugovorima, ipak, nisu predviđeni rokovi za dostavu izvještaja, forma izvještaja niti obaveza izvještaja nezavisnog revizora.

Dodjela sredstava tekuće rezerve ostalim korisnicima se, i tokom 2016. i 2017. godine, vršila na netransparentan način, bez objave javnih poziva za sve zainteresovane korisnike. Primjetna je i ranije utvrđena praksa da Vijeće ministara krajem kalendarske godine donosi odluke o raspodjeli sredstava tekuće rezerve korisnicima na način da se jednom odlukom raspodjeli većina sredstava koja do tada nisu bila raspoređena<sup>21</sup>.

### **Odluke predsjedavajućeg Vijeća ministara i zamjenika predsjedavajućeg Vijeća ministara o dodjeli sredstava tekuće rezerve u 2017. godini**

Zakonom o budžetu za 2017. godinu predsjedavajući Vijeća ministara i njegovi zamjenici ponovo su dobili pravo na raspolaganje sredstvima tekuće rezerve. Od odobrenog iznosa za tekuću rezervu za 2017. godinu (3.307.000 KM), 175.400 KM je odlukama predsjedavajućeg i zamjenika predsjedavajućeg Vijeća ministara dato na raspolaganje neprofitnim organizacijama i pojedincima u svrhu finansijske podrške za različite namjene.

Dodjela sredstava budžetske rezerve predsjedavajućeg Vijeća ministara i zamjenika vrše se u skladu sa odlukama<sup>22</sup> o dodjeli sredstava budžetske rezerve koje donese predsjedavajući i zamjenici pojedinačno. Kriteriji su, kao i u slučaju članova Predsjedništva, općenito postavljeni te su njima tek definisani najveći pojedinačni iznosi dodijeljenih sredstava za tri široko definisane kategorije korisnika.<sup>23</sup>

<sup>19</sup> Vrhbosanska nadbiskupija, projekat u vrijednosti od 170 000 KM za opremanje rezidencije.

<sup>20</sup> Obaveza po ugovoru je, između ostalog, i izvještaj nezavisnog revizora nakon okončanja projekata i dostava narativnog izvještaja.

<sup>21</sup> Odluka Vijeća ministara broj 213/16, Službeni glasnik BiH broj 76/16; Odluka Vijeća ministara broj 305/17, Službeni glasnik BiH broj 6/18; Odluka Vijeća ministara broj 316/17, Službeni glasnik BiH broj 8/18

<sup>22</sup> Odluke o kriterijima za dodjelu sredstava interventne budžetske rezerve br. 01-02-1-379/17, 09-3-63-2/17, 01-02-2-639-1/17

<sup>23</sup> 1. Fizičke osobe, 2. Pravne osobe, udruženja, neprofitne i nevladine organizacije, 3. Vjerske zajednice



Revizija je na bazi uzorka provjeravala da li korisnici dostavljaju izvještaje o namjenskom utrošku sredstava koja su u 2017. dodijelili predsjedavajući Vijeća ministara i njegovi zamjenici.

Iz Kabineta predsjedavajućeg Vijeća ministara dobili smo odgovor da ovaj Kabinet ne raspolaže podacima o izvještajima korisnika o namjenskom utrošku dodijeljenih sredstava, te smo upućeni da se sa zahtjevom za dostavljanje traženih informacija obratimo Ministarstvu finansija i trezora. Iz Ministarstva finansija i trezora smo dobili odgovor da ni oni ne raspolažu traženim informacijama te da upit pošaljemo uredima ili kabinetima ovlaštenih lica za odobravanje interventnog korištenja sredstava tekuće budžetske rezerve.

Revizorskom timu, na bazi odabranog uzorka, dostavljena je dokumentacija o utrošku sredstava koje su dodijelili zamjenici predsjedavajućeg Vijeća ministara.

### **Odluke članova Predsjedništva o dodjeli sredstava tekuće rezerve za 2016. i 2017. godinu**

Od 2015. godine, Zakonom o budžetu proširen je krug donosilaca odluka o dodjeli sredstava tekuće rezerve na način da isti obuhvata i članove Predsjedništva. U posmatranoj 2016. godini, od ukupno odobrenog iznosa sredstava tekuće rezerve (959.000 KM), članovi Predsjedništva su odobrili 359.590 KM neprofitnim organizacijama i pojedincima u svrhu finansijske podrške za različite namjene. Od odobrenog iznosa za tekuću rezervu za 2017. godinu (3.307.000 KM), 359.560 KM je odlukama članova Predsjedništva dato na raspolaganje neprofitnim organizacijama i pojedincima u svrhu finansijske podrške za različite namjene.

Dodjelu sredstava nije pratilo objavljivanje javnog poziva kao ni kriterija za apliciranje, pa i dalje nisu zadovoljeni principi transparentnosti.

Dodjela sredstava tekuće rezerve u 2016. i 2017. godini se vršila na osnovu internog pravilnika<sup>24</sup> Predsjedništva. Pravilnikom su definisani široki kriteriji za dodjelu sredstava koji glase: humanitarne potrebe, podrška obrazovanju, razvoju duhovnosti, kulturnog stvaralaštva i sporta, podrška nevladinom sektoru, kao i druge namjene.

Pravilnik predviđa i obavezu korisnika sredstava da donosiocu odluke dostavi izvještaj o utrošku sredstava. U odlukama o dodjeli sredstava također je propisana obaveza dostave izvještaja o namjenskom utrošku sredstava, ali rokovi dostave izvještaja i njegova forma nisu propisani. Uvidom u dostavljene izvještaje iz uzorka vidljivo je da se uglavnom radi o pravdanju utroška sredstava kroz račune i fakture, bez izvještavanja o stvarnim efektima utroška dodijeljenih sredstava.

<sup>24</sup> Pravilnik o dodjeli sredstava interventne tekuće rezerve, broj: 01-50-1-441-12/16, 10.02.2016. godine; Pravilnik o dodjeli sredstava interventne tekuće rezerve za 2017. godinu, broj: 01-50-1-149-8/17;



## Ocjena realizacije preporuka – Aktivnosti institucija na realizaciji preporuka

## Preporuke za Vijeće ministara:

## Preporuka 1.

***U što kraćem roku donijeti pravila i procedure korištenja sredstava tekuće rezerve.***

**STEPEN REALIZACIJE**

**POČETNE AKTIVNOSTI**

Preporuka je upućena Vijeću ministara koje je zaključkom zadužilo Ministarstvo finansija i trezora za realizaciju preporuke iz Izvještaja. U svom odgovoru Uredu za reviziju, Ministarstvo finansija i trezora je dostavilo Plan postupanja po preporukama Ureda za reviziju prema izvještaju o izvršenoj reviziji učinka na temu „Raspodjela i korištenje sredstava tekuće rezerve“ donesenog u januaru 2015. godine. Planom je predviđeno da se u roku od 60 dana od usvajanja Plana donesu jedinstvena pravila i procedure korištenja sredstava iz tekuće rezerve koja trebaju da sadrže jasna pravila u pogledu namjene, uslova i načina izvještavanja o korištenju tekuće rezerve te pravila koja će biti u funkciji onemogućavanja koruptivnih radnji, odnosno korištenja javne pozicije za postizanje neprimjerene koristi za sebe i druge. Jedinstvena pravila i procedure Vijeća ministara trebale su biti donesene 60 dana nakon usvajanja pomenutog Plana. Realizacija date preporuke revizije je više od tri godine od donošenja Plana i dalje u fazi početnih aktivnosti, bez jasne perspektive o njenoj realizaciji i bez promjene stanja u revidiranoj oblasti.

## Preporuka 2.

***Utvrđiti oblasti od posebnog javnog interesa koje će se na transparentan način finansirati iz sredstava tekuće rezerve.***

**STEPEN REALIZACIJE**

**POČETNE AKTIVNOSTI**

Uzevši u obzir međusobnu povezanost i uslovljenost preporuka revizije, Ministarstvo finansija i trezora je u svom Planu postupanja po preporukama Ureda za reviziju posmatralo određivanje oblasti od posebnog javnog interesa kao jedinstvenu aktivnost, zajedno sa donošenjem pravila i procedura za dodjelu tekuće rezerve. S obzirom na to da pravila i procedure za dodjelu tekuće rezerve nisu doneseni, oblasti od posebnog javnog interesa i dalje nisu definisane te je stanje u revidiranoj oblasti u ovom segmentu ostalo nepromijenjeno.

## Preporuka 3.

***Propisati jasne uslove i postupke koji će se primjenjivati u slučajevima kada će odluke o interventnom korištenju sredstava tekuće rezerve donositi predsjedavajući Vijeća ministara i/ili njegovi zamjenici.***

**STEPEN REALIZACIJE**

**POČETNE AKTIVNOSTI**

Ministarstvo finansija i trezora je formulisanje kriterija kojima se reguliše interventno korištenje sredstava također predvidjelo donošenjem jedinstvenih pravila i procedura o korištenju sredstava tekuće rezerve. Kako jedinstvena pravila i dalje nisu donesena i na nivou su planiranja, stepen realizacija ove preporuke se može okarakterisati tek kao početna aktivnost bez jasne perspektive o stvarnoj realizaciji i bez stvarne promjene stanja u revidiranoj oblasti.



## Preporuke za Ministarstvo finansija i trezora:

### Preporuka 4.

***Uspostaviti efikasne mehanizme kontrole i nadzora procesa odobravanja i korištenja sredstava tekuće rezerve.***

**STEPEN REALIZACIJE**

**DJELOMIČNO**

U tehničkom smislu, Ministarstvo finansija i trezora je, u segmentu nadzora korištenja odobrenih sredstava tekuće rezerve, napravilo iskorake. To podrazumijeva unapređenje ISFU sistema putem tzv. projektnog koda preko kojeg se detaljnije vrši praćenje realizacije dodijeljenih sredstava tekuće rezerve institucijama BiH. Do 2015. godine vršena je alokacija sredstava tekuće rezerve na ekonomske kategorije izdataka, te je na takav način bilo teže pratiti realizaciju sredstava dodijeljenih iz tekuće rezerve. Od 2015. godine uvedena je i dodatna kontrola u ISFU sistemu putem tzv. projektnog koda, što osigurava dodatnu kontrolu Ministarstva finansija i trezora nad namjenskim utroškom sredstava tekuće rezerve od strane institucija BiH.

Novim Pravilnikom o finansijskom izvještavanju<sup>25</sup> izvršena je dopuna Obrasca 7 – Pregled doznaka iz tekuće rezerve budžeta. Pored kategorije iznosa odobrenih sredstava tekuće rezerve, uvedena je i kategorija iznosa realizovanih sredstava, tako da je sada vidljivo da li je institucija BiH realizovala odobrena sredstva tekuće rezerve i u kojem iznosu.

Također, institucije BiH obrazlažu kroz svoje redovne periodične i godišnje izvještaje za šta su koristile sredstva tekuće rezerve, ali analiza efekata se, prema riječima sagovornika iz Ministarstva finansija i trezora, ne može sagledati bez uvođenja programskog budžetiranja.

Pored uvođenja tzv. projektnog koda, sagovornici iz Ministarstva finansija i trezora navode da je, na insistiranje ovog Ministarstva, uvedena praksa zaključivanja ugovora između institucija BiH i korisnika sredstava tekuće rezerve, u slučajevima kada je Vijeće ministara donosilac odluka o dodjeli sredstava tekuće rezerve. Prilikom donošenja odluka o dodjeli sredstava tekuće rezerve, Vijeće ministara zadužuje određene institucije BiH da zaključuju ugovore sa krajnjim korisnicima sredstava i na taj način precizno definišu korištenje sredstava i način izvještavanja.

Revizija je, na bazi uzorka, izvršila uvid u ugovore koje su zaključili Ministarstvo civilnih poslova i Ministarstvo vanjske trgovine i ekonomskih odnosa sa korisnicima sredstava tekuće rezerve, a prema Odluci Vijeća ministara<sup>26</sup>. Utvrđeno je da su na osnovu zaključenih ugovora u Ministarstvu civilnih poslova, precizirani odnosi između korisnika sredstava tekuće rezerve i nadležnog ministarstva kao i vrijeme izvođenja aktivnosti predviđenih ugovorom, prava i obaveze ugovornih strana, izvještavanje, kao i uslovi pod kojim se ugovor može raskinuti. Ovo u svakom slučaju predstavlja unapređenje u korištenju sredstava tekuće rezerve, pogotovo ako se uzme u obzir da se radi o dodjeli značajnih sredstava (1.600.000 KM). Sa druge strane, ugovori koje je sklopilo Ministarstvo vanjske trgovine i ekonomskih odnosa sa korisnicima tekuće rezerve manje su precizni; nisu definisani rokovi za dostavu izvještaja, forma izvještaja, kao ni obaveza izvještaja neovisnog revizora.

<sup>25</sup> Pravilnik o finansijskom izvještavanju institucija BiH, broj 01-05-02-2-1993/15 od 20.02.2015. godine, Službeni glasnik BiH broj 25/15.

<sup>26</sup> Odluka Vijeća ministara broj 316/17, Službeni glasnik BiH broj 8/18.



**Preporuka 5.**

***Uspostaviti efikasnu funkciju izvještavanja o efektima korištenja sredstava tekuće rezerve.***

**STEPEN REALIZACIJE**

**DJELOMIČNO**

Odlukama članova Predsjedništva, predsjedavajućeg i zamjenika predsjedavajućeg Vijeća ministara, kao i samog Vijeća ministara, uvedena je obaveza dostavljanja izvještaja o namjenskom utrošku sredstava od strane korisnika tekuće rezerve. Međutim, na osnovu analize odabranog uzorka, utvrđeno je da korisnici ne izvještavaju donosioce odluka o utrošku sredstava u svim slučajevima. Ipak, izvještavanje je prisutno i posebno ohrabruju slučajevi zaključivanja ugovora kojima se reguliše forma izvještavanja, kao i izvještaj nezavisne revizije o verifikaciji troškova projekta. Također, ohrabruje i praksa insistiranja Ministarstva civilnih poslova, sa kojim je korisnik tekuće rezerve sklopio ugovor, na dopuni izvještaja i neprihvatanju nepotpunih izvještaja o utrošku sredstava kao i izvještaja koji ne sadrže izvještaje nezavisne revizije. Pored činjenice da je obaveza izvještavanja o utrošku sredstava uvedena, postoje i dalje aspekti koje je potrebno unaprijediti u vidu propisivanja rokova za podnošenje izvještaja, kao i forme izvještaja. Značaj segment na koji je i dalje potrebno obratiti posebnu pažnju u izvještajima su ostvareni efekti korištenja dodijeljenih sredstava. Model izvještavanja o ostvarenim rezultatima utroška javnih sredstava treba biti u funkciji transparentnosti i podizanja javne odgovornosti spram korištenja javnih sredstava.



### **3.2. Izvještaj revizije učinka smještaj aktivnih vojnih lica u Ministarstvu odbrane**

#### **Cilj i svrha revizije**

Cilj revizije bio je analizirati je li Ministarstvo odbrane efikasno u racionalizaciji izdataka za smještaj AVL na službi u Oružanim snagama BiH.

Izdaci za smještaj AVL u Ministarstvu odbrane čine najveći dio izdataka za smještaj u institucijama BiH. Za ove potrebe se izdvaja više od 8 milijuna KM godišnje, odnosno 45% ukupnih sredstava koje se na nivou institucija BiH troše za smještaj uposlenih u zemlji i inostranstvu.<sup>27</sup>

Revizija je ispitivala je li Ministarstvo odbrane efikasno u pronalaženju i primjeni ekonomičnijeg rješenja za smještaj aktivnih vojnih lica, imajući u vidu da se za ove namjene godišnje izdvajaju značajna sredstva.

#### **Ključni nalazi i zaključci**

Rezultati provedene analize ukazuju da Ministarstvo odbrane nije imalo plan aktivnosti za racionalizaciju izdataka za smještaj AVL, u kojem bi bilo predviđeno koje aktivnosti, u kojem obimu i u kojim rokovima treba poduzimati, kako bi se efikasno i sveobuhvatno riješilo ovo pitanje.

Aktivnosti Ministarstva odbrane na iznalaženju ekonomičnijeg rješenja nisu bile adekvatne i efikasno provedene. Visoki izdaci za ove namjene su prisutni, što ukazuje na neekonomično korištenje budžetskih sredstava. U proteklih osam godina, Ministarstvo odbrane nije uspjelo identifikovati najkvalitetnije rješenje koje bi doprinijelo smanjenju izdataka za smještaj, pretvoriti ga u konkretan sveobuhvatni projekat, osigurati njegovo finansiranje i realizaciju i tako smanjiti izdatke za smještaj AVL.

Iako je Ministarstvo odbrane od 2006. godine poduzimalo određene aktivnosti s ciljem smanjenja izdataka za smještaj AVL, izostalo je jasno i sveobuhvatno opredjeljenje za iznalaženje i realizaciju ekonomičnijeg rješenja smještaja AVL. Aktivnosti Ministarstva odbrane su najčešće završavale jednostavnim analizama, bez jasnih i konkretnih opredjeljenja.

Aktivnosti Ministarstva odbrane započete 2013. godine na parcijalnom rješavanju pitanja smještaja AVL u adaptirane objekte na tri lokacije unutar kasarni (Rajlovac, Čapljina i Derventa), također su neefikasne, pa se i dalje propušta mogućnost ostvarivanja ušteta i ekonomičnog korištenja budžetskih sredstava.

#### **Trenutno stanje u revidiranom području**

Ministarstvo odbrane nije preduzimalo značajnije aktivnosti na projektu trajnog rješavanja smještaja AVL.<sup>28</sup>

Prema informacijama iz izvještaja finansijske revizije Ministarstva odbrane za 2015. i 2016. godinu, nije došlo do smanjenja izdataka za smještaj vojnih i drugih lica u Ministarstvu odbrane.

<sup>27</sup> Prilog 1: Udio naknada za smještaj AVL i drugih naknada za smještaj u ukupnim naknadama za smještaj uposlenih u institucijama BiH, Izvještaj revizije učinka Smještaj aktivnih vojnih lica u Ministarstvu odbrane BiH.

<sup>28</sup> Izvještaj finansijske revizije Ministarstva odbrane za 2015. godinu i Izvještaj finansijske revizije Ministarstva odbrane za 2016. godinu.



U 2015. godini za ovu namjenu utrošeno je oko 8,3 miliona KM, i u 2016. godini oko 8,2 miliona KM.

U odgovoru na upit Ureda za reviziju o poduzetim aktivnostima po izvršenoj reviziji učinka „Smještaj aktivnih vojnih lica u Ministarstvu odbrane BiH“, Ministarstvo odbrane je konstatovalo da su u projekat ušli bez urađene studije izvodljivosti, opravdanosti i isplativosti uvođenja sveobuhvatnog novog koncepta smještaja, tako da su u toku realizacije započetih aktivnosti suočeni sa nizom neusaglašenih stavova te da će u narednom periodu donijeti konkretan zaključak o pitanju nastavka ovih aktivnosti.

Ministarstvo odbrane je, između ostalog i u skladu sa preporukama revizije, 2016. godine donijelo Akcioni plan za implementaciju smještaja profesionalnih vojnih lica<sup>29</sup>, ali je postupanje po istom izostalo. Uvidom u Akcioni plan vidljivo je da su naznačeni rokovi za aktivnosti istekli. Primjera radi, Ministarstvo odbrane je, prema usvojenom Akcionom planu, trebalo tokom 2018. godine već samostalno vršiti unajmljivanje stanova za smještaj aktivnih vojnih lica.

Revidirani subjekt nije pristupio rješavanju problema smještaja aktivnih vojnih lica i u razumnom roku nije popravljeno stanje u ovoj oblasti, te nisu realizovane aktivnosti na koje se Ministarstvo odbrane obavezalo usvajanjem Akcionog plana.

---

<sup>29</sup> Odluka o odobrenju Akcionog plana za implementaciju smještaja profesionalnih vojnih lica, broj: 06-03-28-2644/16 od 13.06.2016. godine.



## Ocjena realizacije preporuka – Aktivnosti institucija na realizaciji preporuka

## Preporuke za Ministarstvo odbrane:

## Preporuka 1.

***U što kraćem roku, Ministarstvo odbrane se treba jasno opredijeliti za sveobuhvatno i ekonomično rješenje pitanja smještaja AVL koji imaju pravo na naknadu smještaja.***

**STEPEN REALIZACIJE****POČETNE AKTIVNOSTI**

Navedena preporuka nije realizovana ni četiri godine nakon objave izvještaja revizije učinka. Revizija je stepen realizacije preporuke ocijenila kao početnu aktivnost, jer nije bilo napretka u revidiranoj oblasti, ali institucija planira u narednom periodu, a prema odgovoru koji je Ministarstvo odbrane dostavilo, donijeti konkretan zaključak o pitanju nastavka aktivnosti na traženju najekonomičnijeg rješenja za smještaj AVL.

Ministarstvo odbrane je 2016. godine također donijelo i Akcioni plan za implementaciju smještaja profesionalnih vojnih lica. Planirano je preduzimanje niza mjera i aktivnosti prema preporukama revizije i zaključcima nadležnih institucija. Izvještaj o dosadašnjoj realizaciji Akcionog plana nije sačinjen, niti su poduzimane aktivnosti na implementaciji mjera iz Akcionog plana. Evidentirana je tek početna aktivnost za koju se ne može trenutno sa sigurnošću tvrditi da će i rezultirati promjenom stanja u revidiranoj oblasti, odnosno implementacijom preporuka revizije.

## Preporuka 2.

***Sveobuhvatno rješenje smještaja AVL, za koje se odluči Ministarstvo odbrane, potrebno je prezentirati Zajedničkoj komisiji Parlamentarne skupštine BiH za odbranu i sigurnost i Vijeću ministara u cilju dobivanja podrške za njegovu realizaciju.***

**STEPEN REALIZACIJE****NISU PREDUZETE AKTIVNOSTI**

Pošto nije donesena konačna odluka kojom bi se definisao prihvaćeni i usuglašeni prijedlog smještaja AVL, nije ni došlo do prezentiranja sveobuhvatnog rješenja nadležnim sa ciljem dobivanja podrške. Nisu konstatirane aktivnosti na realizaciji preporuke niti je bilo napretka u revidiranom području.

## Preporuka 3.

***Nakon odobranja prijedloga rješenja za smještaj AVL, od strane Vijeća ministara, potrebno je izraditi akcioni plan za njegovu realizaciju.***

**STEPEN REALIZACIJE****NISU PREDUZETE AKTIVNOSTI**

Do konačnog rješenja koje bi bilo prihvatljivo kako sa pozicije aktivnih vojnih lica tako i sa pozicije menadžmenta nije došlo te ova aktivnost nije u fokusu prioriteta.<sup>30</sup> Nisu konstatirane aktivnosti na realizaciji preporuke te napredak u revidiranom području nije ostvaren.

<sup>30</sup> Izvještaj Ministarstva odbrane o poduzetim aktivnostima i dokazima po izvršenoj reviziji učinka „Smještaj aktivnih vojnih lica u Ministarstvu odbrane BiH“ br. 15-16-1-2025-2/18 od 20.06.2018.





**Preporuka 4.**

***U vezi sa parcijalnom realizacijom projekta adaptacije objekata za smještaj AVL na tri lokacije, za koje je izrađena projektna dokumentacija, Ministarstvo odbrane se treba žurno opredijeliti u pogledu daljnjih aktivnosti kako bi se osigurala efikasnost u njihovom provođenju.***

**STEPEN REALIZACIJE**

**NISU PREDUZETE AKTIVNOSTI**

Ministarstvo odbrane još uvijek nije donijelo konačnu odluku kako riješiti smještaj pripadnika Oružanih snaga BiH, te iz tog razloga nije se išlo u realizaciju aktivnosti na ugovaranju za adaptaciju i preuređenje postojećih objekata.<sup>31</sup> Nisu konstatirane aktivnosti na realizaciji preporuke, nije bilo napretka u revidiranom području.

**Preporuka 5.**

***U vezi sa prethodnom preporukom, nakon eventualnog kandidiranja i odobravanja navedenog projekta, potrebno je izraditi akcioni plan za njegovu realizaciju sa svim elementima navedenim u preporuci broj 3.***

**STEPEN REALIZACIJE**

**NISU PREDUZETE AKTIVNOSTI**

Nije se pristupilo parcijalnoj realizaciji smještaja.<sup>32</sup> Nisu konstatirane aktivnosti na realizaciji preporuke i nije ostvaren napredak u revidiranom području.

**Preporuka 6.**

***Ministarstvo odbrane treba usvojiti konačne kriterije smještaja i donijeti potrebna akta kako bi se otklonila svaka mogućnost njihovog naknadnog preispitivanja u toku primjene odabranog rješenja smještaja AVL.***

**STEPEN REALIZACIJE**

**NISU PREDUZETE AKTIVNOSTI**

Nisu konstatirane aktivnosti na realizaciji preporuke, nije bilo napretka u revidiranom području.<sup>33</sup>

Tim revizije učinka:

**Eldina Pleho, vođa tima, v.r.**

**Radivoje Jeremić,**  
rukovodilac Odjela za kontrolu  
kvaliteta, metodologiju i planiranje revizije učinka,  
v.r.

**Davorka Lučić, revizor učinka, v.r.**

<sup>31</sup> Izvještaj Ministarstva odbrane o poduzetim aktivnostima i dokazima po izvršenoj reviziji učinka „Smještaj aktivnih vojnih lica u Ministarstvu odbrane BiH“ br. 15-16-1-2025-2/18 od 20.06.2018. godine.

<sup>32</sup> Ibid.

<sup>33</sup> Ibid.



## **DODACI**

DODATAK 1. Iznosi odobrenih sredstava tekuće rezerve po donosiocima odluka

DODATAK 2. Pregled institucija BiH sa iznosom i namjenom odobrenih sredstava tekuće rezerve

**DODATAK 1. Iznosi odobrenih sredstava tekuće rezerve po donosiocima odluka****Tabela 1: Iznos odobrenih sredstava tekuće rezerve po donosiocima odluka u periodu 2012.-2014. godina (u KM)**

Red. br.	Donosioci odluka o korištenju sredstava tekuće rezerve	Iznos odobrenih sredstava tekuće rezerve		
		2012.	2013.	2014.
<b>1</b>	<b>Po odluci Vijeća ministara (1.1 + 1.2.)</b>	<b>3.325.578,00</b>	<b>6.440.633,00</b>	<b>2.227.005,43</b>
1.1	Institucije BiH	2.622.578,00	4.956.833,00	2.127.005,43
1.2.	Ostali korisnici	703.000,00	1.483.800,00	100.000,00
<b>2.</b>	<b>Po odluci predsjedavajućeg Vijeća ministara</b>	<b>46.200,00</b>	<b>114.000,00</b>	<b>50.400,00</b>
<b>3.</b>	<b>Po odluci zamjenika predsjedavajućeg Vijeća ministara</b>	<b>46.200,00</b>	<b>113.983,00</b>	<b>48.200,00</b>
<b>4.</b>	<b>Po odluci zamjenika predsjedavajućeg Vijeća ministara</b>	<b>46.200,00</b>	<b>113.980,00</b>	<b>50.400,00</b>
<b>5.</b>	<b>Ukupno (1+2+3+4)</b>	<b>3.464.178,00</b>	<b>6.782.596,00</b>	<b>2.376.005,43</b>
<b>6.</b>	<b>Zakon o Budžetu</b>	<b>3.465.000,00</b>	<b>8.552.000,00</b>	<b>3.787.000,00</b>

Izvor: Ured za reviziju na osnovu izvještaja o izvršenju Budžeta institucija Bosne i Hercegovine i međunarodnih obaveza Bosne i Hercegovine za 2012., 2013. i 2014. godinu i odluka o odobravanju sredstava tekuće rezerve za 2012., 2013. i 2014. godinu objavljenih u Službenom glasniku BiH.

**Tabela 2: Iznos odobrenih sredstava tekuće rezerve po donosiocima odluka u periodu 2015.-2017. godina (u KM)**

Red. br.	Donosioci odluka o korištenju sredstava tekuće rezerve	Iznos odobrenih sredstava tekuće rezerve		
		2015.	2016.	2017.
<b>1</b>	<b>Po odluci Vijeća ministara (1.1 + 1.2.)</b>	<b>5.198.050,46</b>	<b>598.938,00</b>	<b>2.541.586,63</b>
1.1	Institucije BiH	2.437.050,46	363.000,00	711.445,33
1.2.	Ostali korisnici	2.761.000,00	235.938,00	1.830.141,30
<b>2.</b>	<b>Po odluci predsjedavajućeg Vijeća ministara</b>	<b>77.500,00</b>	<b>0,00</b>	<b>59.900,00</b>
<b>3.</b>	<b>Po odluci zamjenika predsjedavajućeg Vijeća ministara</b>	<b>82.280,00</b>	<b>0,00</b>	<b>60.000,00</b>
<b>4.</b>	<b>Po odluci zamjenika predsjedavajućeg Vijeća ministara</b>	<b>82.000,00</b>	<b>0,00</b>	<b>55.500,00</b>
<b>5.</b>	<b>Po odluci člana Predsjedništva</b>	<b>123.208,00</b>	<b>120.000,00</b>	<b>120.000,00</b>
<b>6.</b>	<b>Po odluci člana Predsjedništva</b>	<b>124.319,00</b>	<b>120.000,00</b>	<b>119.600,00</b>
<b>7.</b>	<b>Po odluci člana Predsjedništva</b>	<b>124.144,00</b>	<b>119.590,40</b>	<b>119.960,00</b>
<b>8.</b>	<b>Ukupno (1+2+3+4+5+6+7)</b>	<b>5.811.501,46</b>	<b>958.528,40</b>	<b>3.076.546,63</b>
<b>9.</b>	<b>Zakon o Budžetu</b>	<b>5.821.000,00</b>	<b>959.000,00</b>	<b>3.307.000,00</b>

Izvor: Ured za reviziju na osnovu izvještaja o izvršenju Budžeta institucija Bosne i Hercegovine i međunarodnih obaveza Bosne i Hercegovine za 2015., 2016. i 2017. godinu i odluka o odobravanju sredstava tekuće rezerve za 2015., 2016. i 2017. godinu objavljenih u Službenom glasniku BiH.



## DODATAK 2. Pregled institucija BiH sa iznosom i namjenom odobrenih sredstava tekuće rezerve

Tabela 1: Pregled institucija BiH sa iznosom i namjenom odobrenih sredstava tekuće rezerve u 2016. godini

Naziv institucije	Iznos odobrenih sredstava tekuće rezerve	Namjena odobrenih sredstava tekuće rezerve
Tužilaštvo BiH	190.000 KM	Finansiranje troškova ekshumacija
Predsjedništvo BiH	100.000 KM	Finansiranje Samita Brdo-Brijuni
Ministarstvo vanjskih poslova BiH	42.000 KM	Finansiranje Samita šefova vlada zemalja Centralnoevropske inicijative
Ured za razmatranje žalbi	31.000 KM	Finansiranje troškova zakupa poslovnog prostora

Izvor: Ured za reviziju na osnovu Izvještaja o izvršenju Budžeta institucija Bosne i Hercegovine i međunarodnih obaveza Bosne i Hercegovine za 2016. godinu i odluka o odobravanju sredstava tekuće rezerve za 2016. godinu objavljenih u Službenom glasniku BiH.

Tabela 2. Pregled institucija BiH sa iznosom i namjenom odobrenih sredstava tekuće rezerve u 2017. godini

Naziv institucije	Iznos odobrenih sredstava tekuće rezerve	Namjena odobrenih sredstava tekuće rezerve
Ministarstvo prometa i komunikacija BiH	200.000 KM	Kapitalni izdaci
Ministarstvo vanjske trgovine i ekonomskih odnosa BiH	135.000 KM	Podrška međunarodnom poljoprivrednom sajmu u Novom Sadu
Ministarstvo vanjske trgovine i ekonomskih odnosa BiH	106.000 KM	Finansiranje troškova zakupa
Centralna izborna komisija BiH	60.000 KM	Finansiranje kupovine namještaja
Direkcija za evropske integracije BiH	40.000 KM	Troškovi zakupa i selidbe
Centralna izborna komisija BiH	39.000 KM	Finansiranje troškova provođenja ponovnih izbora
Ured za razmatranje žalbi	32.987 KM	Troškovi zakupa
Generalni sekretarijat VM BiH	30.000 KM	Samit premijera Zapadnog Balkana i povjerenika EU za proširenje
Vijeće za državnu pomoć BiH	25.600 KM	Plaće i naknade troškova zaposlenih
Ministarstvo vanjske trgovine i ekonomskih odnosa BiH	25.000 KM	Finansiranje IV konferencije na visokom nivou o saradnji u oblasti turizma NR Kine i zemalja Centralne i Istočne Evrope
Ministarstvo vanjskih poslova BiH	10.000 KM	Obilježavanje 15 godina članstva BiH u Vijeću Evrope
Arhiv BiH	5.000 KM	Plaćanje uvoznih taksi za doniranu robu
Ministarstvo pravde BiH	2.858 KM	Troškovi prevoza i smještaja

Izvor: Ured za reviziju na osnovu Izvještaja o izvršenju Budžeta institucija Bosne i Hercegovine i međunarodnih obaveza Bosne i Hercegovine za 2017. godinu i odluka o odobravanju sredstava tekuće rezerve za 2017. godinu objavljenih u Službenom glasniku BiH.